


E. 5147.29

no. 1, 2



IOANNIS KEPLERI

Mathematici Cæsarei

DISSERTATIO

Cum

EVNCIO SIDEREEO

nuper ad mortales misso

à

GALILÆO GALILÆO

Mathematico Patauino.

Alcinous.

Δεῖ δ' ἐλευθέριον εἶναι τῇ γνώμῃ τὰ μέλλοντα φι-
λοσοφῆν.

Cum priuilegio Imperatorio.



FRANCOFVRTI,

Apud D. Zachariam Palthenium.

ANNO M. DC. XI.

E. 5147.29 no. 2

1511 199K 315.7 A 11

1511 199K 315.7 A 11

DISSERTATION

and

ANALYSIS

OF THE

OF THE

OF THE

OF THE

OF THE

OF THE



OF THE

OF THE

OF THE



ILLVSTRISSIMO ET REVEREN-
diſſimo Domino, D.

IULIANO ME-
DICES, SERENISS.
MAGNI HETRVRIÆ
DVCIS

Apud ſacram Cæſaream Maiestatem

ORATORI,

Domino meo Colendiſſimo.

ILLVSTRISSIME Domi-
ne, Epistolam hanc meam
ad Galilæum Galilæum,
Professorem Mathemati-
cum in celeberrima Aca-
demia Patauina, de Nuncio eius Side-
reo perſcriptā, & iam typis descriptam,
cui potius inſcribam, quā Illustriſſimę
Dn. Tuæ non inuenio. Tu enim exaran-
de illius author mihi fuiſti, primū tranſ-

A 2 miſſo

misso ad me 6. Idus Aprilis, per Thomā
 Segethum exemplari Nuncii fiderei; &
 die mihi dicto ad Idus, quo te conueni-
 rem: post vt comparui, prælecta mihi, ex
 literis ad Te, Galilæi postulatione, tuaq;
 adiuncta cohortatione, qua percepta, &
 promisi me intra diem, quo solent abire
 cursores, exaraturum aliquid, & præstiti.
 Sed & nuper admodum à me cum ob-
 uium habuisses, diligenter petisti, vt ex-
 emplum epistolæ, si quod retinuissem,
 Tibi concederem legendū: ipsam quip-
 pe epistolam, quamuis apertam exhi-
 buissem, per occupationes illius diei, nō
 potuisse cognoscere: quod rursum pro-
 misi me facturū, primum atq; ad mun-
 dum descripsissem. Concepi autem il-
 lam initio, & iam typis expressi, tanto li-
 bentius, quod & Galilæus, ad quem illa
 destinābatur, MEDICEORVM Cliens
 esset; & MEDICEI Principis, Magni
 Hetruriæ Ducis Legatus, ipse quoque
 Gente MEDICEVS, hoc à me peteret:
 & denique materia, de qua scribendum
 erat, esset eiusmodi, qua (si quidem vera
 traderentur) MEDICEI nominis ho-
 nos, authoris cōsilio cōprehenderetur.

DEDICATORIA. 3

Accipe igitur, Illustrissime Domine ex priuata & Galilæi propria, publicam descriptione factam, publicam dedicationem Tuam : exque hac dedicatione studium meum in veritate, & quod hac sola nititur, MEDICEI Principatus decorare, post Galilæum authorem, asserendo, cognosce; meumque erga Illustriss. D. T. animum ad obsequia paratissimum æstima: Denique me inter Clientes tuos numera. Vale. 5. Nonas Maias. Anno Christi Domini, M. DC. X.

Illustrissima Dominationi Tuæ

ad obsequia deuotum;

IOANNES KEPLERVS
S. C. Maieſt. Mathematicus.



AD LECTOREM ADMONITIO.



Um multi sententiam meam super Galilaei nuncio fidereo expeterent; satisfacere placuit omnibus hoc opera compendio; ut Epistolam ad Galilaum missam (magna quidem festinatione inter occupationes necessarias, intra praescriptum diem fusam) publicis typis exscriberem.

Atqui amici ea iam excusa monuerunt, videri paulo conceptam insolentius. Alius enim ablatum cupiebat exordium: quidam mitigata voluisset verba nonnulla, quae sententias à Scholarum consuetudine recedentes Antagonistae tribuere, videri possint improvidis: non nemo parcius etiamnum laudatum Galilaum desiderabat, ut locus relinqueretur sententiae clarissimorum virorum, quos diuersum à me sentire audiant.

Itaque consilium hoc inii, ut monerem Lectorem; Suum cuique pulchrum: plerosque contendendo excandesce; mihi gratius disputationum videri condimentum, hilaritatem: Alii grauitate assuevationum dignitatem affectant in tradenda philosophia, fiunt tamen & ipsi saepe prae ter institutum ridiculi; Ego ad id natura factus videor, ut laborem & difficultatem doctrinae, remissione animi, stylo expressa, temperem.

*Quod igitur exordium attinet, meminerit Lector,
id ad*

id ad eum perscriptum esse, quem consentaneum sit legisse praefationem meam super Commentaria Martis, nuper edita, qua & allegata videt. Lusus enim seu iocus militaris, quo sum usus in opere illo publico, deriuatus est in hoc etiam exordium priuatae epistolae iure non deteriori.

Ad alteram censuram eadem est responsio; fingo animi gratia inter disputantes litem, rixas, victoris triumphum, minas atroces: poenam victi, ruborem, vincula, carceres, exilium: quae serium quid pollicentur, ac si vterque super sua sententia, veluti super aris & focis dipugnet. Atqui non est opus moneri Academicos (ceteri saltem cogitent) quid sit Positionem suam custodire: quod dum facit alter; non tantum vera & recepta, sed etiam absurda, falsa (imo in scholis saepe etiam impia, perniciofa, blasphema) pro suis usurpat; eaque, ut fert dicendi occasio, vel sibi videri, vel se credere, se statuere, se probare, vel probaturum profitetur, cum secum nihil minus credat: tantum ut exercitatum reddat alterum in defendenda veritate. Adeoque maior est festiuitas contentionis; si simplicior aliquis de veritate, velut de statu suo, contrarii improuisa assertionem deturbetur, iubeaturque defendere, quod defensionis eger nunquam cogitauerat.

Quod tertium caput obiectionis attinet; equidem fucati nihil de Galileo scripsi. Semper hunc morem tenui, ut quae bene ab aliis dicta putarem, collaudarem; quae male, refellerem; nunquam contemptor aut dissimulatore alienae scientiae, ubi propria caruissim: nunquam vel seruus aliorum, vel mei negligens; si quid proprio Marte inuenissim melius, aut prior.

8 ADMONITIO AD LECT.

Neque puto, tantum de me Germano, Galileum Italum esse meritum; ut ei vicissim adulandum fuerit, in veritatis, aut penitissimæ meæ sententiæ præiudicium.

Nemo tamen existimet, me, hac meæ libertate assentiendi Galileo, dissentiendi ab ipso libertatem alio ereptum ire : Saluo cuiusque iudicio illum laudavi. Quinimo si qua hic etiam propria dogmata suscepi defendenda; quamvis id veritatis opinione, serioq; animo feci: non tamen grauatim eadem me polliceor abiecturum, primum atque mihi doctiorum aliquis errorem legitima methodo demonstrauerit.



Nobili & Excellentiss. Domino,

GALILÆO GALILÆO,
PATRICIO FLORENTINO,
PROFESSORI MATHESEOS
in Gymnasio Patauino

IOANNES KEPLERVS,
Sacra Cæs. Maiest. Mathematicus
S. P. D.



AMPRIDEM domi meæ confederâ ociosus, nihil nisi te cogitans, Galilææ præstantissime, tuasq; literas. Emisso enim superioribus nundinis in publicû libro meo, Cõmentaria de Motibus Martis, inscripto multorum annorum labore: ex quo eo tempore, quasi qui difficilissima expeditione bellica gloriæ satis peperissê, vacatione nonnulla studiis meis interposita, fore putabam, vt inter cæteros & Galilæus, maxime omnium idoneus, mecum de nouo Astronomiæ seu Physiçæ cœlestis genere promulgato per literas conferret; intermissumq; ab annis duodecim institutum resumeret.

Ecce vero tibi ex inopinato circa Idus Martias, Celerum operæ nunciatum in Germaniam, Galilæi mei, pro lectione alieni libri occupationem propriam insolentissimi argumenti de quatuor Planetis antea incognitis (vt cæte-

ra libelli capita præteream) vsu perspicilli duplicati inuentis: quod cum illustris S. C. Maiestatis Consiliarius, & Sacri Imperialis Consistorii Referendarius, D. Ioan. Matthæus Wackherius à Wackhenfelsz, de curru mihi ante habitationem meam nunciaffet; tanta me incessit admiratio, absurdissimi acroamatis cōsideratione, tanti orti animorum motus (quippe ex inopinato decisa antiqua inter nos liticula) vt ille gaudio, ego rubore, risu vterque ob nouitatem confusi, ille narrando ego audiendo vix sufficeremus. Augebat stuporem meum, Wackherii adseueratio; viros esse clarissimos, doctrina, grauitate, constantia, supra popularem vanitatem longissime euectos, qui hæc de Galilæo perscribant: adeoque iam librum sub prælo versari, proximisque cursibus affuturū.

Me, vt primum ab ore Wackherii disceffi, Galilæi potissimum mouit authoritas, iudicii rectitudine, ingeniiq; solertia parta. Itaque meditatus mecum sum, qui possit aliqua fieri accessio ad Planetarum numerum, saluo meo mysterio cosmographico, quod ante annos tredecim in lucem dedi: in quo quinque illæ Euclidis figuræ, quas Proclus ex Pythagora & Platone Cosmicas appellat, Planetas circa Solem non plures sex admittunt.

Apparet autem ex præfatione illius libri, & me tunc quæsiuisse plures circa Solem Planetas, sed frustra.

Quod igitur hæc perpendenti incidebat, curri-

curriculo ad Wackherium detuli: nimirum vti terra, vnus ex Planetis (Copernico) Lunam suam habeat, extra ordinem sese circumcurstantem; sic fieri sane posse, vt Galilæo quatuor alia Lunæ minutissimæ, angustissimis meatibus circa Saturni, Iouis, Martis & Veneris corpuscula circumuolui videantur: Mercurium vero, circumsolarium vltimum, tam esse immersum in Solis radios, vt in eo nihil adhuc simile potuerit à Galilæo deprehendi.

Wackherio contra visum, haud dubie circa fixarum aliquas circumire novos hos Planetas (quale quid iam à multo tempore mihi ex Cardinalis Cusani & Iordani Bruni speculationibus obiecerat) ac, si quatuor ibi latuerint hætenus Planetæ, quid igitur impedire, quin credamus innumerabiles porro alios ibidem, hoc initio factò detectum iri: adeoq; vel mundum hunc ipsum infinitum, vt Melisso & Philosophiæ Magneticæ authori Gulielmo Gilberto Anglo placuit: vel, vt Democrito & Leucippo, & ex recentioribus Bruno & Brutio, tuo Galilæi & meo amico, visum, infinitos alios mundos (vel, vt Brunus, terras) huius nostri similes esse.

Sic mihi sic illi visum, interim dum librum Galilæi, vt erat spes facta, cupidine mira legendi expectamus.

Primum exemplum concessu Cæsaris mihi contigit inspicere, cursimque peruolitare: *Videō magna longeque admirabilissima spectacula, proposita*

*posita Philosophis & Astronomis, ni fallor & mihi
video ad magnarū contemplationum exordia omnes
vera Philosophia cupidos conuocari.*

Iam tum gestiebat mihi animus, me rebus
inferre, quippe prouocatum, & qui eadem de
materia ante annos sex scripsissem; tecum-
que Galilæe solertissime, de tam inexhaustis
Louæ conditoris thesauris, quorum alios
post alios nobis aperit, iucundissimo scriptio-
nis genere conferre. Quem enim tacere sinūt
tantarum rerum nuncii? Quem non implet
diuini amoris abundantia, per linguam & ca-
lamum sese profundens vberime?

Addebant animum Augustissimi Cæsaris
Rudolphi imperia: qui meum de hac materia
iudicium expetebat. De Wackherio vero quid
dicam? Ad quem ut veni sine libro, lectorem
tamen eius professus: inuisum mihi, rixatum
etiam fuit; denique plane conclusum, ut in
hac materia non differrem fieri quam diser-
tissimus.

Dum aliquid meditor: superueniunt literæ
tuæ ad Illustriss. Magni Hetruriæ Ducis La-
gatum, plena tui in me amoris, ut qui hoc mi-
hi honoris impertitus sis; ut per tātum virum
potissimum me & transmissio exemplari, &
addita commonefactione, prouocandum ad
scribendum censueris: quod & præstitit in tui
gratiam perquam humaniter, & me in clien-
telam suam suscepit beneuolentissime.

Quod igitur mihi propria animi propen-
sione;

lione; quod amicis placet; quod diligenter ipse rogas; id faciam: non nulla spe inductus, me hac epistola id tibi profuturum, si eam censueris ostendendam; ut contra morosos nouitatum censores, quibus incredibile quicquid incognitū; profanum & nefandū, quicquid ultra cōsuetas Aristotelicæ angustię metas, vnō proaspisite sis processurus instructior.

Temerarius forte videri possim, qui tuis assertionibus, nulla propria experientia suffultus tam facile credam: At qui non credam Mathematico doctissimo, cuius vel stylus iudicii rectitudinem arguit, qui tantum abest ut sese vanitati dedat, seseq; vidisse dicat quæ non viderit, popularem auram captans; ut vel receptissimis opinionibus, veritatis amore nō dubitet repugnare, vulgiq; vituperia susq; deq; ferre? Quid quod publice scribit, probrumq; si quid committeretur, clam habere nequaquam posset? Egone ut Patricio Florentino fidem derogem de iis quæ vidit? perspicaci lusciosus? instrumētis ocularibus instructo, ipse nudus & ab hac supellectili inops? Ego non credam omnes ad eadem spectacula inuitanti; & quod caput est, vel ipsum suum instrumentum, ad faciendam fidem oculis, offerenti?

An parum hoc fuerit, Magnorum Heturriæ Ducum familiam ludificari, Mediceumq; nomen figmentis suis præfigere, planetas interim veros pollicentem?

Quid quod propriis experimētis, quod & aliorum

liorum asseuerationibus, in parte libri deprehendo veracissimum? Quid causæ sit, cur solum de quatuor planetis deludendum sibi putauerit orbem?

Tres sunt menses cum Augustissimus Imperator super lunæ maculis varia ex me quæsiuit, in ea cõstitutus opinione, Terrarũ & continentium simulachra in luna ceu in speculo resplendescere. Allegabat hoc potissimum sibi videri expressam Italiæ cum duabus adiacentibus insulis effigiem: Specillum etiam suum ad eadem contemplanda offerebat in dies sequentes, quod omissum tamen est. Adeo eodem tempore Galilæe, Christi Domini patriâ vocabulo præferens, Christiani orbis Monarcham (eiusdem irrequieti spiritus instinctu, qui naturam detectumibat) deliciis tuis æmulatus es.

Sed & antiquissima est hæc de maculis lunæ narratio, fulta authoritate Pythagoræ & Plutarchi summi philosophi, & qui, si hoc ad rem facit, Procõsulari imperio Epirum tenuit sub Cæsaribus. Vt Mæstlinum adeoque & mea optica ante annos sex edita præteream, inq; suũ locum inferius differam.

Hæc igitur cũ consentientibus testimoniis etiam alii de lunæ corpore asseuerent, consentanea iis quæ tu de eodem longe dilucidissima affers experimenta: tantum abest, vt fidem tibi in reliquo libro & de quatuor circumlouias planetis derogem; vt potius optem mi-

hi in parato iam esse perspicillū, quo te in deprehendendis circum-Martialibus (vt mihi proportio videtur requirere) duobus, & circum-Saturniis sex vel octo præuertam, vno forsan & altero circum-Venerio, & circum-Mercuriali accessuro.

Quam ad venaturam, quod Martem attinet, tempus erit maxime idoneum October venturus, qui Martem in opposito Solis exhibet; terris (præterquam anno 1608.) omnium proximum, errore calculi tritum amplius graduum.

Age igitur, vt de rebus certissimis, meisque oculis, vt omnino spero, videndis, tecum Galilæe sermonem conferam; tui quidem libri methodum secuturus, omnes vero Philosophiæ partes, quæ vel ex hoc tuo nuncio ruinam minantur, vel confirmantur, vel explicantur iuxta peruagaturus: vt nihil super sit, quod lectorem Philosophiæ deditum suspensum teneat; & vel à fide tibi perhibenda prohibeat, vel ad contemnendam quæ hæctenus erat in præcio, Philosophiam impellat.

Primum libelli tui caput in fabrica perspicilli versatur, tantæ quidem efficaciz, vt rem spectanti millies exhibeat maiori planitie, quod tum sit, si diameter tricies bis repræsentetur longior. Quod si facultas æstimatoria manet in sententia consuetæ magnitudinis; necesse est ei tunc rem videri tricies bis propiorem. Distantiam enim oculus non videt
sed con-

sed coniicit, vt docent optici. Da enim hominem aliquem abesse tribus millibus & ducentis passibus, videri vero sub angulo tricies bis maiori, quam videtur alius sine perspicillo centum passibus absens: cum certum habeat oculus, hominem illum remotum, habere consuetam magnitudinem, censebit nō pluribus centum abesse passibus, adiuuante & clarificatione visionis, perspicillo procurata.

Incredibile multis videtur epichirema tam efficacis perspicilli, at impossibile aut nouum nequaquam est; nec nuper à Belgis prodiit, sed tot iam annis antea proditum à Io. Baptista Porta, Magiæ naturalis libro XVII. Cap. X. de Cristallinæ lentis affectibus. Vtque appareat, ne compositionem quidem cauæ & conuexæ lentis esse nouam; age verba Portæ producamus. Sic ille.

Posito oculo in centro, retro lentem, quæ remota fuerint, adeo propinqua videbis, vt quasi manuum ea tangere videaris, vt valde remotos cognoscas amicos: Literas epistolæ in debita distantia collocata, adeo magnas videbis, vt perspi.ue legas: si lentem inclinabis, vt per obliquum epistolam inspicias, literas satis maiusculas videbis, vt etiam per viginti passus remotas legas: & si lentes multiplicare noueris, non vereor quin per centum passus minimam literam conspiceris, vt ex vna in alteram maiores reddantur characteres. Debilis visus ex visus qualitate specillis viatur. Qui id recte sciuerit accommodare: non paruum nanciscetur secretum,

cretum. Concaua lentes, quæ longe sunt, clarissime cernere faciunt conuexæ propinqua, vnde ex visus commoditate his frui poteris. Concauo longe parua vides, sed perspicua, conuexo propinqua maiora, sed turbida: Si vtrumque recte componere noueris, & longinqua & proxima maiora & clara videbis. Non parum multis amicis auxilii præstitimus; qui & longinqua obsoleta, proxima turbida conspiciebant, vt omnia perfectissime contruerentur. Hæc Capite X.

Capite XI. nouum titulum facit de specillis, quibus supra omnem cogitatum longissime quis conspiciere queat: sed demonstratiõnem de industria (quod & profitetur) sic inuoluit, vt nescias quid dicat, an de lentibus perlucidis agat, vt hætenus, an vero speculum adiungat opacum læuigatum: cuiusmodi vnũ & ipse in animo habeo, quod res remotas, nullo discrimine absentia, in maxima quantitate, ideoque vt propinquas, & præterea proportionaliter auctas exhibet; tanta claritate, quanta ex speculo (quod necessario coloris fusci est) sperari potest.

Huic loco libri Portæ, cum viderem præfixam querelam initio capitis X. *Cauarum & conuexarum lentium, & speculorum, tantoperè humanis vsibus necessariorum, neque effectum neque rationes adhuc à nemine allatas: eam operam sumpsi ante annos sex in astronomiæ parte Optica; vt quid in simplicibus perspicillis accideret luculenta demonstratiõne geometrica redderem expeditum.*

Videre est ibi Capite V. vbi demonstro illa quæ pertinent ad modum videndi, fol. 202. cōiunctas in schemate effigies caui & cōuexi perspicilli, plane ad eum modū, quo solent hodie in vulgatis tubis inter se iungi. Quod si non lectio Magiæ Portæ, occasionem dedit huic machinamēto, aut si nō aliquis Belgarū ex ipsius Portę instructione fabrefactū instrumentum, solutis silentii legibus morte Portæ, multiplicauit in plura exempla, vt mercede venalem faceret: hæc certe effigies ipsa fol. 202. libri mei potuit curiosum lectorem admonere de structura, præsertim si lectionem demonstrationum mearum cum textu Portæ coniunxit.

Non est tamē incredibile, solertes sculptores in gente industria, qui perspicillis ad sculpturæ minutias videndas vtuntur, casu etiam in fabricam hanc incidisse; dum lentes conuexas cauis varie associant, vt quæ combinatio melius seruiat oculis, eam eligant.

Non ista dico ad depressendam inuentoris mechanici laudem, quisquis fuit: Scio quantum intersit inter rationales coniecturas, & ocularem experientiam; inter Ptolemæi disputationem de Antipodibus, & Columbi detectionem noui orbis: adeoque & inter ipsos vulgo circūlatos tubos bilentes; & inter tuam Galilæe machinam, qua cælum ipsum terebrasti: sed nitor hic fidem incredulis facere instrumenti tui. Fatendum est, me ex eo tēpore, quo Optica sum aggressus, creberrime à Cæsare

farerogatum de Portæ suprascriptis artificijs,
 fidem iis vt plurimum derogasse. Nec mirum,
 miscet enim manifeste incredibilia probabili-
 bus:& titulus Capitis XI. verbis: (*Supra omnem*
cogitatum quam longissime prospicere.) videbatur
 absurditatem opticam inuoluere: quasi visio
 fiat emittendo, & perspicilla acuant oculi ia-
 culos, vt ad remotiora penetrent, quam si nul-
 la perspicilla adhiberentur: aut si vt agnoscit
 Porta, visio fit recipiendo: quasi tunc specilla
 rebus videndis lucem concilient vel augeant:
 cum hoc potius verum sit, quæ non vltro ad
 nostros oculos eiaculantur aliquam luculam,
 qua mediante conspiciantur, nunquam illa
 vlllo perspicillo detegi posse. Præterea crede-
 bam non tantum aerem esse crassum & colo-
 re cæruleo, quo visibilium partes minutę emi-
 nus obtegerentur & confunderentur; quod
 cum per se certum sit, frustra videbam expe-
 ctari à perspicillo, vt hanc aeris interfusi sub-
 stantiam à visibilibus detergat: sed de ipsa et-
 iā cœlesti essentia tale aliquid suspicatus sum,
 quod nos, si maxime lunæ corpus in immen-
 sum augeamus, impedire possit, quo minus
 exiguas eius particulas in sua puritate seorsim
 à cœlesti materia profundissima agnoscere
 possimus. Has igitur ob causas abstinui à ten-
 tando mechanica, concurrentibus insuper a-
 liis etiam impedimentis.

At nunc merito tuo Galilæe solertissime
 commendo indefessam tuam industriam,

diffidentia omni posthabita, recte te ad oculorum experimenta contulisti, iamque orto per tua inuenta veritatis sole, omnes istas titubationū larvas cum nocte matre dispulisti, quidque fieri posset facto demonstrasti.

Te monstrāte agnosco substantiæ cœlestis incredibilem tenuitatē, quæ quidem & ex opticis meis fol. 127. patet, si proportionē densitatis aeris ad aquam conferas cum proportionē densitatis ætheris ad aerem, procul dubio multo maiori : quæ efficit, vt ne minutissima quidem stellati orbis (nedum lunaris corporis, stellarum humilimæ) particula nostros oculos effugiat, tuo instrumento instructos, multoque plus materiæ (vel opacitatis) in vno specilli corpusculo interponatur inter oculū & rem visam, quam in toto illo immēso ætheris tractu: quia ex illo aliquantula resultat obscuritas, ex hoc nulla: vt pene concedendum videatur, totum illud immensum spacium vacuum esse.

Et si igitur auide tuum Galilæe instrumentū expecto: tamen si qua mihi sors affulgebit, vt mechanica remotis obstaculis tentare possim; strenue me in iis exercebo, idque gemina via. Nam vel multiplicabo lentes perfectarum sphericarum hinc inde superficierum, lenissime assurgentium; easq; certis interuallis in arundine disponam, exteriores paulo latiores, vt tamen oculus intra terminum intersectionis parallelorum omnium lentium constitua-
tur: de

tur : de quibus terminis vide optica mea folio 190. & fol. 440. vel vt vnica superficie errorem (si quis esset) facilius corrigere possim; vnam solam lentem seu vmbonem effigiabo, altera superficie proxime plana quippe in cōuexitatem sphæricā folius dimidii gradus seu 34. minutorum assurgente: reliqua nō sphærica quæ ad oculum vergit, ne mihi cōtingat, quod fol. 194. ostendit Schema, fiatque partium rei visæ distortio & confusio, de qua est prop. XVIII. fol. 193. sed in vmbonem assurgente, vt est fol. 198. in schemate demonstratum, vt sit humori crystallino oculi similis; linea quippe hyperbolica tornata descriptū, quā fol. 106. in schemate quæsiui propter machinamenta Optica, vt est fol. 96. & fol. 109. scilicet vt non distorta fiat visio, sed partiū rei visæ imagines augeantur proportionaliter: vt proposui fol. 105.

Hæc inquam in constituenda lente cōuexa obseruabo, vt maiora præstem visibilia: oculumq; non longe ab hoc puncto collocabo, in quod omnium rei visæ punctorum radii (quæ proprietas est huius vmbonis hyperbolici) vnice confluunt: hyperbola eousq; continuata erit, vt radius ex puncto seu centro hoc in cōtingentem extremū hyperboles, faciat angulū 27. ideoq; refractionem circiter 9. vt ad triginta semisses graduum habeam in vtriusque lateris refractione extrema, in intermediis proportionaliter minus. Quia verò vnus puncti de re lucente tam remota radiationes, proxime

parallelæ descendūt ad vmbonem; post quem conuergentes in humorē oculi crySTALLINŪ incidunt, adeo vt post crySTALLINUM facta refractione cōcurrant in puncto, proxime crySTALLINUM, & ab eo se rursus dilatent, donec in retiformem veniant iam dilatati instar penicilli, atq; ita pro punctis lunæ singulis, singulæ retiformis illustrantur superficies, adeo vt confusissima fiat visio; ideo ad oculum cuiuslibet spectantis peculiarem pro diuersitate oculorū adhibebo lentē cauam, vt conuergentes vnus puncti radii, contraria refractione in cauo facta, prohibeantur conuergere; sed potius diuergentes, & sic velut ab aliquo propinquo puncto veniētes in crySTALLINŪ incidant, perq; cum refracti, in retiformi ipsa sortiantur suæ collectionū puncta: quæ definitio est visionis distinctæ: quæ omnia demonstrauī fol. 202. meę Optices. Atq; hæc de instrumento ipso; Iam quod vsum eius attinet, argutū sane est inuentum tuū, quomodo cognoscatur, quanta fiat rerū per instrumentum ampliatio, & quomodo singula in cœlo minuta minorumq; partes dignosci possint. Quæ in re cū in certamen veniat industria tua cum Tychonis Brahei in obseruando certitudine accuratissima: nō abs re fuerit aliquid interloqui. Memini cū Polyhistor ille scientiarū omnium Io. Pastorius ex me quæreret, nō vna vice; nū adeo limatæ sint Braheanæ obseruationes, vt plane nihil in iis desiderari posse putem? valde me contendisse, ventum

ventum esse ad summū, nec relictū esse quicquam humanæ industriæ, cum nec oculi maiorem ferant subtilitatē, nec refractionū negotium, siderum loca respectu horizontis statu mouens: atq; hic illum contra constantissime affirmasse; venturū olim, qui perspicillorum ope subtiliorem aperiat methodum: cui ego refractiones perspicillorum vt ineptas ad Observationū certitudinē, opposui. At nunc demum video, verum in parte vatem fuisse Pistorium. Ipsæ quidem Brahei Observationes persestant, habentq; suam laudem. Nam quid sit in cœlo arcus 60. graduum; quid 34. minuta: hoc solis Brahei instrumentis innotescit. At vbi Braheus hoc pacto gradus cœlestes (vel ē ego meo artificio Optico Lunæ diametrū) in cœlo fuerimus dimensuri: iam superueniens tuū Galilæe perspicillū, & quantitātē illam à Braheo & à me proditam cōplectens, subtilissime illā in minuta & minutorū partes subdiuidit; seseq; Brahei methodo obseruandi, elegantissimo coniugio associat: vt & Braheus ipse habeat, quo tua obseruatiōis methodo gaudeat, & tu tuam ex Braheana necessario instruas.

Vis dicam quod sentio? Opto mihi tuū instrumentum in Eclipseos lunaris contemplatione: sperarē ex eo præstantissima præsidia ad expoliendū, est vbi & reformandū, totū Hipparchum meum, seu demonstrationem intervalloꝝ & magnitudinis triū corporum, Solis, Lunæ & Terræ. Diametrorū enim Solis &

Lunæ differentiam variabilem, digitosque in Luna deficientes nemo exactius numerabit, nisi qui tuo instructus oculari, diligentiam in obseruando adhibuerit.

Stet igitur Galilæus iuxta Keplerum, ille Lunam obseruans, conuerso in cœlum vultu, hic Solem, auersus in tabellam, (ne oculum verat specillum) suo vterque artificio: & ex hac societate prodeat olim nitidissima interuallo-
rum doctrina.

Quinetiam (præter Lunam) Mercurium ipsum in disco Solis hoc meo artificio vidi: videlicet libellum hac de re editum.

Nec minus etiam, si Cometa quispiam effulserit, parallaxes eius (vt & Lunæ) ad stellulas illas minutissimas & creberrimas, solo tuo instrumento conspicuas, collatæ, obseruari rectissime poterunt: ex quibus de altitudine corporum illorum certius, quam hæctenus vnquam, licebit argumentari.

Atq; hæc tecum Galilæe, ad primum libelli tui caput, conferre libuit.

Transis secundo ad phænomena Lunaria præstantissima: qua mentione refricas mihi memoriam eorum, quæ in Astronomiæ parte Optica Cap. VI. de luce siderum Numero 9. super maculis Lunæ, ex Plutarcho, Mæstlino, meisq; experimentis adduxi.

Ac initio perquam iucundū est, & me ipsum in eiusdem lunæ maculis, non vt tu, conuerso, sed auerso vultu obseruandis, esse versatum.

Schema

Schema huius rei habes fol. 247. mei libri: ex quo illud patet, mihi quoq; limbum lunæ apparuisse lucidissimum vndique, solum corpus interius maculis fuisse distinctum.

Ex eo, subit animum certare tecum in peruidendis illis minutis maculis, à te primum in parte lucidiore animaduersis. Id autem hoc pacto me spero perfecturum mea obseruandi ratione, vultu à Luna auerso; si lunæ lumen per foramen in tabellam pertica circumlatam intromisero, sic tamen, vt foramē obuallet lens crystallina, sphærico maximi circuli gibbo, & tabella ad locum collectionis radiorū accommodetur. Sic in pertica 12. pedes longa, lunæ corpus perfectissime depingetur quantitate monetæ argenteæ maioris. Artificium demonstraui prop. 23. fol. 196. & 211. libri mei; simplicius tamen fuit propositum à Porta primo titulo Cap. VI. de lente, cum ego de integro globo demonstraui.

Pergamus Galilææ, tua excutere phenomēna; Nam cum ætate lunæ auspicaris obseruata tua, primumque ostendis, quid corniculatæ desit ad oualis lineæ perfectionem. Qualem esse speciem circuli illuminatorii demonstraui numero 8. fol. 244. libri mei: terse igitur & plane mathematice loqueris.

In consideratione macularum à te primum animaduersarum in parte Lunæ lucida; omnino optice demonstras ex illuminationis ratione, illas esse cauitates aliquas seu depressas la-

eunas in lunari corpore. Sed excitata disputationem, quidnam sint illæ tam crebræ lunæ maculæ partis antiquitus lucidæ putatæ. Tu eas cum vallibus comparas nostræ Telluris; & fateor esse nonnullas huiusmodi valles, præsertim in Styria prouincia, specie quasi rotundas, faucibus angustissimis fluuium Muram recipientes supra, emittentes infra, ut sunt campi dicti Græcensis, Libnicensis, & ad Drauū Marpurgenfis, aliique per alias regiones, quos circum campos altissima consurgunt montium iuga, speciem aheni exprimentia; quippe non minima pars latitudinis camporum est altitudo circumiectarum crepidinum. Equidem fateor, & tales in Luna valles esse posse, sinuosis montium recessibus propter fluuios excavatas. At quia addis tam crebras esse has maculas, ut assimilent lucidam partem corporis lunaris caudæ pauonis, in varia specula, velut oculos distinctæ: subit igitur animum, num in Luna hæ maculæ quid aliud notent. Apud nos enim in Tellure sunt sinuosæ nonnullæ valles, at sunt etiam in longum protensæ secundum fluuiorum decursum, profunditatis non contemnendæ: cuiusmodi veluti perpetua vallis est Austria fere tota propter Danubium, inter Morauia & Styriæ montes depressa, & quasi recondita. Cur igitur nullas tales longas in Luna maculas prodis? cur plerasque circulo circumductas? Anne licet coniecturis indulgere, Lunam veluti pumicem quendam esse, creber-

rimis

rimis & maximis poris vndique dehifcentem? Patieris enim æquo animo, vt hic per occasionem aliquid indulgeam speculationibus meis, Commentario de Marte Cap. XXXIV. folio 157. propositis: vbi ex eo quod Luna à Tellure duplo celerius incitatur, quam partes ipsæ telluris extimæ in circulo æquatore; collegi, lunare corpus esse rarum admodum, quodque exigua materiæ paucæ contumacia præditum raptui Telluris non multum resistat.

Veruntamen hæc (de absolutis cauitatibus non per montes formatis) tanti non sunt, vt si iuxta tuas sequentes narrationes stare omnino nequeant, pertinaciter defendenda putem. Nam clarissimis experimentis lege plane optica reddidisti confirmatissimum, in lunari corpore multos per lucidam partem, præsertim inferius, consurgere apices, instar altissimorum montium nostræ Telluris, qui primi orientis in Luna Solis fruuntur, eaque tibi perspicillo tuo vtenti detegantur.

Quid iam dicam de tua super antiquis maculis Lunæ disputatione exactissima? Cum folio 251. libri mei sententiam Plutarchi adduxissem, Lunæ maculas illas antiquas pro Lacubus seu Maribus habentis, lucidas partes pro continentibus: non dubitavi me opponere, & contraria ratione in maculis continentes, in lucida puritate humoris vim ponere: qua in re mihi Wackherius valde applaudere est solitus. Adeoque his disputationibus
supe-

superiori ætate indulsumus (credo quod Natura per nos eadem moliebatur, quæ per Galilæum obtinuit paulo post) vt in ipsius Wackerii gratiam, etiam Astronomiam nouam, quasi pro iis qui in Luna habitant, planeque Geographiam quandam Lunarem cōderem; cuius inter fundamenta & hoc erat; maculas esse continentes, lucidas partes maria. Quid me mouerit vt hic Plutarcho contradicerem, videre est fol. 251. libri mei, experimentum scilicet tibi allegatum, quod cepi in monte Styriæ Scheckel, ex quo mihi subiectus fluuius videbatur lucidus, terre tenebrosiores. At infirmitatem applicationis folio verso margo ipse indicat. Scilicet non luce communicata ex Sole vt Terræ, lucebat fluuius, sed luce repercussa ex aere illuminato. Propterea & causas experimenti tentauit infelicititer. Nam contra doctrinam Aristotelis, libro de Colorib. hoc affirmari: aquas minus de atro participare, quā terras, Qui enim hoc verum esse possit, cum Terræ aquis tinctæ nigriores euadāt? Et quid multis, da Lunam ex alba gleba constare, vt Cretam insulam, (quomodo Lucianus Lunā dixit Casei similem Terram esse) concedendū erit, clarius resplendescere illam ex illuminatione Solis, quam maria, quantumuis non atramento imbuta.

Itaq; nihil me liber meus impedit, quo minus te audiam, contra me, pro Plutarcho, mathematicis argumentis differentem, illatione
argu-

argutissima & inuicta. Lucidæ quippe partes multis ciuitatib. dehiscunt, lucidæ partes tortuosa linea illuminantur, lucidæ partes eminentias habent magnas, quib. vicinas partes præuertunt in illuminatione: ex dem & cōtra Solem sunt lucidæ, parte à Sole auersa tenebrose: quæ omnia in sicco & solido & eminenti locū habent, in liquido minime. Contra tenebras partes, notæ antiquitus sunt æquabiles; tenebras partes tarde illuminantur, quod earum arguit humilitatem, cum circumstantes eminentes iam longe lateq; colluceant, & à tenebris illuminatis nigrore quodam, velut vmbra distinguantur; linea illuminationis in parte tenebrosa recta est, in quadris: quæ vicissim in humore competunt, ima petentem, & pondere suo fusa ad æquilibrium.

His inquam argumentis plane satisfacisti: do, maculas esse maria, do lucidas partes esse Terram.

Neque hæc tua experimenta perspicacissima, vel meo ipsius testimonio carēt. Nam fol. 248. Optices meæ, habes Lunæ bisectione lineam tortuosam, ex quo elicui eminentias & depressiones in Lunæ corpore. Fol. 250. exhibeo Lunam in eclipsi, figura laniatæ carnis aut asseris fracti: striis lucidis sese in partem vmbrosam insinuantibus: qua obseruatione idem tecum, sed alio argumenti genere euinco, Lunæ partes inæquales esse, has eminentes, illas profundas; non iam ex vmbre projectione, sed ex
co quod

eo quod debilitatum Solis radium in confinio Eclipsis, aliæ Lunæ partes fortius, alię debilius excipiunt & reuibrant. At hæc confuse tantum & superficialiter à me annotata sunt, nulla distinctione maculosarum partium à lucidis. Tua vero diligentia, quam ordinatim omnia persequitur? Qui etiam maculas ipsas veteres albicantibus areolis æquabilibus, ceu maria planis insulis interstinctas exhibes.

Neq; satis mirari possum, quid sibi velit ingens illa, circuloque rotundata cavitatis, in sinistro, ut ego loqui soleo, oris angulo: naturæ ne opus sit, an manus artificis. Nam profecto consentaneum est, si sunt in Luna viuentes creaturæ (qua in materia mihi post Pythagoram & Plutarchum iam olim Anno 1593. Tubingæ scripta disputatione, inde in Opticis meis fol. 250. & nuperrime in supradicta Geographia Lunari ludere placuit) illas ingenium suæ provincię imitari, quę multo maiores habet montes & valles quam nostra tellus, ideoque mole corporum maxima præditas, immania etiam opera patrare: cumque diem habeant quindecim nostros dies longam, æstusque sentiāt intolerabiles; & fortasse careant lapidibus ad munitiones contra Solē erigendas, at contra glebam forsan habeant in modum argillæ tenacem: hanc igitur illis ædificandi rationem visitatam esse, ut campos ingentes deprimant, terra calculo egesta & circumfusa, forte & humoris in profundo eliciendi causa, ut ita in profundo,

fuñdo, post tumulos egestos in vmbra lateant, intusque ad motum Solis & ipsi circumambulent vmbra[m] consecretantes, atque hæc sit illis veluti quædam species vrbis subterraneæ, domus, speluncæ creberrimæ, in crepidinem illâ circularem incisæ; ager & pascua in medio, vt solem fugientes à prædiis tamen longius non cogantur recedere.

Sed sequamur porro etiam filum tuæ scriptiõis, Quæris cur non inæqualis etiam appareat extremus Lunæ circulus? Nescio quam id diligenter fueris contemplatus, an ne potius hic ex opinione vulgi quæras? Nam libro meo fol. 249. & fol. 250. in pleniluniis aliquid sane in hac extrema circuli perfectione desiderare me professus sum. Perpēde, & quid tibi videatur iterato enuncia; tuis enim ocularibus fidam.

Ad quæstionem tu quidem, vt de re certa respondes gemino modo. Primus meis experimentis non repugnat. Nam si frequentia & constipatio verticum aliorum post alios in extremo adspectabilis hemisphærii limbo, speciem exhibent perfecti circuli, fieri non potest, nisi vertices ad tornum æquati & abradi sint; vt non minutulæ nonnullæ rimulæ aut tuberculi compareant; quod meis obseruatis esset consentaneum.

In altero modo Lunæ circumfundis Sphæram aeriam, quæ in deuexa globi reducta, profunditatem aliquam radiis Solarib. & terrestribus

bus, adeoque & nostris oculis obiciat; vnde ille limbi merus & emaculatus splendor, tota interiori facie: qua non ita profunde nostris obtutibus obstat hic aer, crebris maculis scattente.

Potuit te huius aeris Lunaris admonere liber meus fol. 252. & 302. quę libri mei loca tuis hic experimentis egregie confirmas. Sane non video, qui Selenitę illi in plenilunio, quod nos videmus (cæterique inuisibilis hemisphærii in nouilunio) quibus temporibus ipsis est meridies, immanes Solis æstus tolerare possint, si nō aer turbidus Solem illis, vt fit apud Peruanos, crebro tegat, æstumque humore temperet; qui aer in plenilunio & maculas magis occultat, & splendorem ex Sole ingentem combibitatque ad nos reuibrat.

Quid tu de aere dicis circa Lunam, cum Mæstlinus libello Tubingæ edito anno 1606. etiam pluuias in ea conspexerit. Sic enim ille Th. 152.

In Eclipsi Lunari vespere Dominica Palmarum anni 1605. in corpore Luna versus Boream, nigricās quadam macula conspecta fuit, obscurior cætero toto corpore, quod candentis ferri figuram representabat. Dixisses nubila, in multam regionem extensa, pluuiis & tempestuosis imbribus grauida, cuiusmodi ab excelso- rum montium iugis in humiliora conuallium loca, videre non raro contingit. Hæc ille.

Nec vero putes antiquarum macularum vnam fuisse; mōstrauit ipse mihi Mæstlinus anno su-

no superiori diagramma. Macula erat & situ & magnitudine differens: quippe quæ quartam circiter aut quintam partem planiciei Lunarum occupabat; & præterea adeo atra, vt etiam in obtenebrata Luna eluceret.

Tradit eo libello à Th. 88. Lunæ affinitatem cum Terra, in densitate, vmbra, caligine, lucē à Sole mutuacitia; quæ globum vtrumq; circumambulet, quæ æquales & Terriculis Lunæ phases exhibet, & Lunicolis Terræ: vt vtrumque corpus, ab altero æqualiter illuminetur, quo loco magnam partem complectitur meæ Astronomiæ Lunarum. Alterum gradum cognationis horum corporum Th. 92. collocat in asperitate superficieum: quodque notatu dignū est, ex tribus locis Auerrois citat dictum Aristotelis ex libro de animalibus, *quod Luna terrena natura admodum sit affinis.*

In specie de aere circa Lunare corpus circumfuso à Th. 145. ex professo agit, cuius ista sunt verba Th. 149. tuis Galilæe verbis adeo similia, vt ex tuo libello desumpta videantur: *Si Luna corpus, inquit, quacumq; phase probe intuearis, extremam oram multo limpidiori puriori que luce claram, nec vllis maculis conspersam videbis: cum tamen ab interiori corpore plurime nigricantes notæ passim emicent. Quis hic dicit, vniformis illius lucis non esse aliud quam huius obscurioris turbidi & maculati splendoris subiectum?* Concludit hinc corpus limbi esse pet lucis lum, quasi vitreum aerium, homogeneous, denique aeris nostri circum-

terrestris plane simile. Multus quidem est in eo, vt tecum Galilæe, hunc aerem ex eo etiam signo probet, *quod pars lumine Solis perfusa amplioris circumferentia apparet, quam reliquum orbis tenebrofi*: quod Mæstlinus multis probat experimentis, nō nocturnis tantum, quarum causa in visum reiici posset, sed & diurnis, quando stella Veneris se post Lunæ bifidæ partem umbratam recipit. Verum pace vestra mihi liceat, ego & si aerem Lunæ concedo, tamen super hoc experimento maneo in sententia: lumen hinc Lunæ, inde stellæ, de die etiam sese in oculo ampliare, locumque partis tenebræ carpere, vt ea minuta, lucida magna putetur. Vide Optica mea fol. 217.

Sequitur in tuo libello fol. 13. ingeniosa & legitima demonstratio eius quod à me quoq; fol. 250. passim dictum est, demonstratum veto minime: Montes Lunares multo maiores esse terrenis; idque non tantum in proportionem suorum globorum, quod ego dixeram: sed in comparatione simplici. Scilicet desiderabatur ad hoc demonstrandum, tuum perspicillum, tua in obseruando diligentia.

Nec minus ingeniose te fol. 14. comparas ad obseruationem disci Lunaris, cum eius primæ nascuntur cornua, docesq; cornua obiectu tecti tegere, vt reliquus discus emineat. Est hic mihi modus obseruandi vitatissimus.

Quod vero demonstrationem attinet, quæ ostendit hoc Lumen ex nostra Tellure effundi, etiam

ea iam à viginti annis eoq; amplius fuit penes Mæstlinum, ex cuius doctrina illam transtuli in meam Astronomiæ partem Opticam Cap. VI. nu. 10 fol. 252. plenissimo tractatu: vbi eadem etiam opiniones, (quod lumen hoc sit à Sole, vel à Venere) tecum eodem modo refuto, nisi quod hanc vltimam merito suo, paulo quam tu, mollius excipio.

Putas fol. 15. ruborem illum Lunæ alieneū, quem circa extremitates vmbre terrenæ Luna eclipsata retinet, reliquo corpore fusca & euanida, esse ex illuminatione vicinæ substantiæ ætheriæ. Adiuuas meam de eodem rubore disputationem fol. 271. Opticorum: vbi eam ex refractis in nostro aere Solis radiis deduco: & accommodas ea quæ fol. 301. adduxi. ad rationem dicendam, cur in totali Solis Eclipsi nō semper nox fiat mera: quæ in libro de stella noua fol. 117. repetii. Dubito Galilæe, an possit hæc à te dicta causa huic sufficere rubori: hæc enim, vti vis aurora, Lunare corpus circumstat multo æquabilius, quam vt rubor iste sic inæquabiliter in Lunā deriuetur, vt ostendunt mea fol. 276. allata experimenta: quæ vbi in tuo systemate mundi in considerationem adduxeris, spero te hac in parte tanto felicius de rerum causis disputaturum.

Ad pallorem tamen Lunæ in mediam vmbra immersæ efficiendum, vbi cessant radii Solis refracti; facile patior, vt iuxta sidera Solem circumstantia, quibus ego fol. 277. palloris

causam transcripsi, hæc tua aurora, vt potior causa adducatur.

Absolui alterum libelli tui caput de Lunæ transeo ad tertium de Sideribus cæteris.

Prima tua observatio est magnitudinis siderum, quorum corpuscula perspicillo inspecta, in proportionem ad Lunæ diametrum astringi minui. Adducis & alia similia, quibus stellæ minuuntur; verissima, & mihi longo usu comperta, crepusculum, diem, nubem, velum, vitrum coloratum.

Hic tuas excutio locutiones, *angulum visorium non à primario stellæ corpusculo, sed à late circumfuso splendore terminari: item perspicillo adscititios accidentalesq; fulgores stellis adimi.*

Quærere lubet ex te Galilæe, num acquiescas in causis à me allatis huius rei, vbi de modo visionis disputo fol. 217. ac præsertim fol. 221. Opt. Nam si nihil desideras, licebit tibi porro proprie loqui; luminosa puncta cono fundere suos in crystallinum, & post eum refractione facta eos rursus in punctum contrahere: quia vero id punctum non attingit retinam, dilatatione noua superficieculam retinæ occupat, cum debuerit occupare punctum: itaq; perspicillorum opera fieri, vt alia refractione intercedente punctum illud in retiformem competat. Non igitur aliqui descendunt radii in oculum, à splendore stellis exterius circumfuso; sed contra qui descendunt ab ipso lucido corpore radii in vitio refractionum, & per noctem
ampli-

amplificatione foraminis vueæ, diffunduntur in splendorē in retiformi circa pur. & ū, quod stellam debuit repræsentare, circumiectum. Neque perspicillum in terra adimit aliquid stellis in cœlo, sed adimit aliquid lucis retiformi quantum eius redundat.

Altera iucūdiſſima tua obſeruatio eſt figuræ fixarum radioſæ, differentis à Planetarū figuris circularibus. Quid aliud inde Galilæe colligemus; quam fixas lumina ſua ab intruſe mittere, planetas opacos extrinſecus pingi: hoc eſt, vt Bruni verbis vtar, illas eſſe Soles, hos Lunas ſeu Tellures. Ne tamēis nos in ſuā pertrahat ſententiam de mundis infinitis, totidē nempe, quot ſunt fixæ, omnib. huius noſtri ſimilibus: ſubſidio nobis venit tertia tua obſeruatio innumerabilis fixarū multitudinis ſupra eā quæ antiquitus eſt cognita; qui nō dubitas pronunciare videri ſtellarū ſupra decem millia. Quanto.n. plures & cōfertiores, tanto verior eſt mea argumentatio, contra infinitatē mundi, libro de ſtella noua, Cap. XXI. fol. 104. propoſita; quæ probat, hunc, in quo verſamur homines, noſtro cū Sole & Planetis, eſſe præcipuum mundi ſinum; neque fieri poſſe, vt ex vlla fixarum talis pateat in mundum proſpectus, qualis ex noſtra tellure veletiam Sole patet. Locum breuitatis cauſa ſuperſedeo deſcribere; proderit ad fidem, totum perlegi.

Accedat auſtarii loco & hæc argumentatio. Mihi, qui debili ſum viſu, ſidus aliquod maiuſculum,

sculum; vt Canis, parū cedere videtur magnitudine, diametro Lunæ, si radios fulgidos accenseam: at qui sunt visu correctissimo, quiq; instrumētis vtuntur astronomicis, quibus nō imponunt hi cincinni vt oculo nudo, ii quantitates diametris stellarum suas describunt per minuta & minutorum partes. Quod si ex mille solum fixis nulla maior esset vno minuto; (sunt aut pleræque ex numeratis maiores) ex coactæ omnes in vnam rotundam superficiem æquarent, (adeoq; & superarent) diametrum Solis. Quanto magis stellarum decies millium disculi in vnum cōflati superabunt magnitudine aspectabili, speciem disci Solis? Si hoc verum, & si sunt illi Soles ex eodem genere cum hoc nostro Sole, cur non etiam illi Soles vniuersi superant splendore hunc nostrū Solem? Cur adeo obscurum vniuersi lumen fundunt in patentissima loca, vt Sol per foramen punctu aciculæ minimo apertum irradians in cameram conclusam, iam statim ipsam fixarum claritatem quanta esset rota camera ablata, infinito pene interuallo superet? Dices mihi, nimium illas à nobis distare? Nihil hoc iuuat hanc causam. Quanto enim distantes magis, tanto quàm Sol maiori diametro sunt vel lingulæ. At interfusus æther fortasse obscurat illas? Nequaquam: cernimus enim illas suis cum scintillationibus, suo cum discrimine figurarum & colorum: quod non esset, si densitas ætheris alicui obstaculo esset.

Satis

Satis igitur hinc clarum est, Corpus huius nostri Solis inæstimabili mensura esse lucidius quam vniuersas fixas, ac proinde, hunc nostrum mundum nō esse è promiscuo grege infinito-
rum aliorum. Quod de re infra plura scribam.

Habes innumerabilitatis stellarum oculatos testes plurimos. Rabinos aiunt numerare supra duodecim millia; noui religiosum, qui nocte quadam illuni plures quadraginta numeravit in clypeo Orionis. Mæstlinus maiusculas in Pletadibus ordinarie numerat, nisi fallor, quatuordecim, non infra magnitudinum terminos.

De Galaxia nubeculis & nebulosis Conuolutionibus beasti Astronomos & Physicos, detecta earum essentia, & confirmatis his, qui pridem hoc idem tecum assueverabant, nihil esse nisi congeriem stellarum confusis luminibus ob oculorum hebetudinem.

Itaque desinent porro cometas & noua sidera cum Braheo efformare ex via lactea: ne perfectorum & perennium mundi corporum interitum absurde introducant.

Tandem ad nouos Planetas tecum transeo: re præcipuæ admirationis in libello tuo; pauca tecum super eo negotio, præter ea quæ initio dicta, collocutus.

Primum exulto, me tuis laboribus non nihil recreari. Si circa vnam fixarum discursitantes inuenisses Planetas; iam erant mihi apud Bruni innumerabilitates parata vincula & car-

cer, imo potius exilium in illo infinito. Itaque magno, in præsens, me liberaſti metu, quem ad primam libri tui famam ex Opponentis mei triumpho conceperam; quod quatuor iſtos Planetas non circa vnâ fixarum, ſed circa ſidus Iouis ais diſcurrere.

Ingens ſane Wackherium Philoſophiæ illius horridæ de nouo ceperat admiratio; quæ, quod nuperrime Galilæus oculis ſuis perſpexiſſet, tot annis antea non tantum opinatiombus introduxerat, ſed plane argumentationibus ſtabiliuerat. Nec immerito ſane magni ſiunt, qui in conſimilibus philoſophiæ partibus, ſenſum ratione peruertunt. Quis enim non maioris faciat nobilitatem doctrinæ aſtronomicæ, quæ cum pedem extra Græciam nunquam extuliſſet, tamen Zonæ frigidæ proprietates prodidit: quam vel Cæſaris experimentationem, qui clepsydris ad littus Britanicum noctes deprchendit, Romanis noctibus paulo breuiiores; vel Belgarum in Septentrione hyemationem, ſtuporis quidem plenâ, ſed quæ citra cognitionem doctrinæ illius fuiſſet impoſſibilis? Quis non celebrat Platonis fabulam de Atlantica, Plutarchi de inſulis auricoloribus Trans-Thulaniſ, Senecæ de futura orbis noui deſectiione verſiculos fatidicos: poſtquam tale quid ab Argonauta illo Florentino tandem fuit præſtitum? Ipſe Columbus, dubiû tenet lectorẽ ſuum; plus is ingenium admiretur, nouû orbem ex ventorum ſtatu

statu coniicientis an fortitudinem tentantis ignotos fluctus, immensumque Oceanum: & felicitatem optatis potiti.

Scilicet in mea etiam materia erunt miraculo Pythagoras, Plato, Euclides, quod Rationis præstantia subuecti concluderunt, aliter factum esse non posse, quam ut Deus mundum ad exemplar quinque regularium corporum exornaret; licet in modo errauerint: vulgaris contra laus erit Copernici, qui ingenio quidem usus non vulgari, descriptionem tamen mundi quasi ocularem fecit, solum τὸ ὅτι in lucem efferens; cedet longe Veteribus Keplerus, qui ex oculari intuitu Systematis Copernicani, quasi ἐκ τῆς ὁπῆς ascendit ad causas easdem adque τὸ διόν, quod Plato à priori desuper tot ante sæculis prodiderat; ostenditque in Systemate mundi Copernicano expressam esse rationem quinque corporum Platoniorum. Nec absurdū aut inuidiosum hoc est, illos his præferri, postulat id ipsa rei natura. Nam si maior est gloria Architecti huius Mundi, quam contemplatoris Mundi, quantumvis ingeniosi, quia ille rationes fabricæ ex seipso deprōpsit, hic expressas in fabrica rationes vix magno labore agnoscit: certe qui rerum causas, antequam res patent sensibus, concipiunt ingenio, in Architecti similiores sunt cæteris, qui post rem visam cogitant de causis.

Itaque non inuidebis Galilæe nostris antecessoribus suam hic laudem, qui quod nuper-

rimetuis oculis deprehēdisse ais, sic esse oportere tibi tanto ante prædixerant. Tu nihilo minus gloria hæc erit, quod vt Copernicus, & ex eo Ego. Veteribus errorē in modo demonstrauimus, quo putabāt expressi esse in Mundo, quinque corpora; substituto modo genuino & verissimo; sic tu hanc Brutii nostri ex Bruno mutuata doctrinam emendas, parum & dubiam reddis. Putabant illi, circumiri etiam alia corpora suis Lunis, vt Tellus nostra sua: Verum illos in genere dixisse demonstras: At putabant fixas stellas esse quæ sic circumirentur: causam etiam dixit Brunus cur esset necesse: Fixas quippe solaris & igneæ esse Naturæ, Planetas aqueæ; & fieri lege Naturæ inuolabili, vt diuersa ista combinentur, neque Sol Planetis, ignis aqua sua, neque vicissim hæc illo carere possit. Hanc igitur illius rationem infirmam esse tua detegunt experimenta. Primum esto vt fixa qualibet Sol sit, nullæ illas Lunæ huc vsq; circumcurritare visæ sunt: Hoc igitur in incerto manebit, quoad aliquis subtilitate obseruandi mira instructus, & hoc detexerit: quod quidem hic successus tuus, iudicio quorundam nobis minatur. Iupiter contra planetarum est vnus, quos Brunus tellures esse dicit, & ecce quatuor alios circa illum planetas: at hoc Telluribus non vindicabat Brunii ratio, sed Solibus.

Interim temperare non possum, quin paradoxos illos ex tuis inuentis etiam hac in parte iu-

iuuem, moneamque veri non ab simile, non
 tantum in Luna, sed etiam in Ioue ipso inco-
 esse; aut (quod nuperrimo congressu quo-
 rundam philosophantium, iucunde motum)
 detegi nunc primum regiones illas; Colonos
 vero, primum atque quis artem volandi do-
 cuerit, ex nostra hominum gente non defutu-
 ros. Quis credidisset olim, tranquilliorē &
 tutiorē esse in nauigationē vastissimi Ocea-
 ni, quā angustissimi sinus Adriatici, maris Bal-
 thici, freti Anglicani? Da naues, aut vela cœ-
 lesti auræ accommoda, erunt qui ne ab illa qui-
 dē vastitate sibi metuant: Adeoq; quasi prope-
 diem affuturis, qui hoc iter tentēt. Ego Luna-
 rē, tu Galilæe Iouialē condamus Astronomiā.

Hæc iucunde sint interposita, miraculo au-
 daciæ humanæ, quæ in huius potissimum sæ-
 culi hominib. sese offert. Non sunt enim mihi
 deridiculo veneranda sacræ historiæ mysteria.

Neque tamen etiam vile operæ precium du-
 xi, obiter aures vellicare altiori philosophiæ,
 cogitet an quicquam frustra permittat genus
 humanæ supremus & prouidens ille custos, &
 quonam ille consilio. veluti prudens promus
 hoc potissimum tempore nobis isthæc operū
 suorum penetralia pandat: quod cōgerro no-
 ster Thomas Segethus, multiplici vir eruditi-
 one, monuit; aut si, quod ego respōdi, Deus cō-
 ditor, vniuersitatem hominum veluti quendā
 succrescentem, & paulatim maturescentem
 puerulum successiue ab aliis ad alia cogno-
 scenda

scenda ducit; (vti quidem tempus erat, cum ignoraretur planetarum à fixis discrimen, & sero admodum à Pythagora siue Parmenide animaduersum; eundem esse Vesperum & Luciferum; nec in Mose, Iobe, aut Psalmis vlla mentio planetarum) perpendat igitur, & quodammodo respiciat; quousque progressum sit in cognitione Naturæ, quâ tum restet; & quid porro expectandum sit hominibus.

Sed ad humiliores cogitationes redeamus: & quod cœptum absoluamus. Si enim quatuor planetae Iouem circumcurstant disparibus interuallis & temporibus: quæritur cui bono, si nulli sunt in Iouis globo, qui admirandam hanc varietatem suis notent oculis? Nā quod nos in hac terra attinet, nescio quibus rationibus quis mihi persuadeat, vt illos nobis potissimum seruire credam, qui illos nunquā conspiciamus; neque est expectandum, vt tuis Galilææ ocularibus vniversi instructi, illos porro vulgo obseruaturi simus.

Quo loco opportune occurrendum duco etiam alii cuidam suspicioni. Erunt enim, quibus vana videatur astrologia nostra terrestris, seu vt philosophice dicam, doctrina de aspectibus: cum numerū planetarum aspectus facientium ad hanc vsque diem ignorauerimus? Verum ii frustra sunt: astra enim in nos agunt iis modulis, quibus eorum motus sese his terris insinuant. Per aspectus enim agunt; at aspectus aff. ctus est anguli in centro terræ vel oculi.

culi. Scilicet non ipsa in nos agunt, sed aspectus eorum fiunt obiectum & stimulus facultatum terrestrium ratione participantium citra discursum solo instinctu.

Iam vero quatuor hi, vt ex tuis Galilææ observationibus patet, & minimi sunt, & nunquã à Ioue vltra 14. minuta digrediuntur: vt totus extimi planetæ orbis minor sit disco Solis vel Lunæ. Quare vt dem ipsos, non impediende minuta quantitate, cōcurrere per aspectus ad mouendas facultates sublunares, non tamen amplius quid poterunt, quam vt & ipsi quatuor, & Iupiter, centrum curriculum eorū, iunctum equent (nec id crebro, Solem, in diuturnitate nonnulla aspectus, ob diametri latitudinem.

Atque hoc pacto manet astrologia suo loco, patetque simul, quatuor hos novos nō primario nobis in Tellure versantibus, sed proculdubio Iouialibus creaturis, globum Iouis circumhabitantibus comparatos.

Id euidentius patet illi, qui tecum Galilææ, mecumque Copernicum sequitur in Systemate mundano: videmus enim in eo Lunam, circumterrestrem planetam, sic comparatam, vt non possit videri aliis globis, quam soli Telluri, quam cursib. suis cingit, destinata. Eius curriculum diameter habetur pro vicesima parte diametri orbis magni Telluris circa Solem, Ego vix tricesimam existimo. Subtendit igitur minus tribus, vel, vt ego, minus duobus gradibus

bus ex Sole inspectus. Accum Saturni altitudo sit decupla, Iouis quintupla circiter: ex Saturno igitur inspecta nostra Luna non ultra 18. vel 12. minuta poterit à Tellure discedere, ex Ioue ad 36. vel 24. minuta: quo pacto est eius ratio plane eadem Saturniis & Iouiis incolis, quæ planetarum circum-Iouialium nobis terrestribus creaturis. Nec abludit magnitudinis ratio. Esto enim, vt parallaxis Solis sit 3. minuta, etsi multo minorem esse putem: Terra igitur ex Sole inspecta habebit 6. minuta, Luna sesqui. Imo terra, multo minor, etiã Lunæ relinquet minus, nempe non vnum minutum. Atque hoc ex Saturno inspectum 6. forte secunda videbitur, ex Ioue 12. secunda. Plane igitur sic est, quod nobis est in Tellure nostra Luna, hoc non est globis cæteris; & quod Ioui sint illæ quatuor lunulæ, id non sunt nobis: & vicissim singulis planetarum globis, eorumque incolis sui seruiunt circulatores. Ex qua consideratione de incolis Iouialib. summi, probabilitate concludimus: quod quidem & Tycho ni Braheo ex sola consideratione vastitatis illorum globorum æque visum fuit.

Adeoq; & hoc argutissime Wackherius monuit, etiã Iouem circa suum volui axem, vt nostram tellurem, vt ad illam conuolutionem gyratio illa quatuor lunarum sequatur, vti ad nostræ Telluris gyrationem nostræ Lunæ conuersio in eandem plagã sequitur: adeoq; nunc demum se credere rationib. magneticis, quibus

bus in nupero meo Physicæ cœlestis cōmentario, volutione Solis circa axem & polos corporis, causas motuū planetariorum expediui.

Nimirum, (vt tu Galilæe pulchre inferis) si Iouem curriculo duodecim annorum occupatum, quatuor circulatores antepone cingunt; quid absurdi dixit Copernicus, Telluri, dum annuo motu redit, vnam lunam eadem ratione adhærescere.

Quid igitur, inquires, si sunt in cœlo globi, similes nostræ telluris, an ne igitur cum illis incertamen venimus, vtri meliorem mundi plagam teneant? Nam si nobiliores illorū globi, non sumus nos creaturarum rationalium nobilissimæ. Quomodo igitur omnia propter hominem? Quomodo nos domini operum Dei?

Difficile est nodum hūc expedire, eo quod nondum omnia, quæ huc pertinent, explorata habemus; vt temeritatis notam vix effigaturi simus, multa de hac quæstione differendo.

Non reticebo tamē, quæ mihi philosophica videantur argumenta adduci posse; quibus obtineatur non tantum in genere, vt supra; hoc Systema Planetarum, in quorum vno nos homines versamur, in præcipuo mundi sinu, circa Cor mundi, Solem nempe versari; sed etiam in specie nos homines in eo globo versari, qui creaturæ rationali primariæ & nobilissimæ (ex corporeis) plane debetur.

Prioris

Prioris affirmati de intimo sinu mundi, vide argumenta supra à multitudine fixarum, quæ promuro hunc sinum certo vallant, & à claritate nostri Solis præ fixis. Quib. adde hoc tertiū, quod mihi hisce dieb. expressit Wackherius, silentioq; consentire visus est.

Geometria vna & æterna est, in mente Dei refulgens: cuius consortium hominibus tributum inter causas est, cur homo sit imago Dei. In geometria vero figurarū à globo perfectissimum est genus. Corpora quinque Euclidea. Ad horum vero normam & archetypū distributus est hic noster mundus planetarius. Da igitur, infinitos esse mundos alios: ii aut dissimiles erunt huius nostri, aut similes. Similes dixeris. Nam cui bono infiniti, si vnus quisque in se perfectionem omnem habet? Aliud enim est de creaturis generationis successionem perennibus. Et Brunus ipse defensor infinitatis, censet, differre oportere singulos à reliquis totidem motuum generibus. Si motibus, ergo & interuallis, quæ pariunt motuum periodos. Si interuallis, ergo & figurarum ordine, genere, perfectione, ex quibus interualla desumpta. Adeoque si mundos inuicem similes statueres per omnia, creaturas etiam feceris similes, & totidem Galilæos, noua sidera in nouis mundis obseruantes, quot mundos. Id autem cui bono? Quin potius cauemur vno verbo, ne progressus fiat in infinitū, quod recipiunt Philosophi: cum assentiatur pro-

gressus

gressus versus minora finitus: cur non & versus maiora? Esto enim Sphæra fixarum; huius pars forte ter millesima Saturni Sphæra, huius item decima pars Telluris Sphæra; Telluris porro tercenties millesima diametri. Homo, hominis tantula pars, cuniculus subcutaneus. Hic sistimus: nec progreditur natura ad minora. Pergamus igitur ad alterum membrum dilemmatis: sint illi infiniti mûdi dissimiles nostri: aliis igitur quam perfectis quinque figuris erût exornati, ignobiliores igitur hoc nostro: unde conficitur, vt noster hic mundus sit illorum omnium, si plures essent, præstantissimus.

Dicamus iam etiam hoc, cur Tellus globo Iouio præstet: digniorq; sit dominantis creaturæ sedes.

Sol quidem in centro mundi est, cor mundi est, fons lucis est, fons caloris, origo vitæ motusq; mundani est. At videtur homo æquo animo illo throno regio abstinere debere, Cœlum cœli Domino, Soli Iustitiæ, Terram autē dedit filiis hominum. Nam & si Deus corpus non habet, nec habitaculo indiget; in Sole tamen (vt passim per scripturam in cœlo) plus exerit virtutis, qua mûdus gubernatur, quam in globis cæteris. Agnoscat igitur homo ipseus etiam habitaculi sui distinctione suam indigentiam, Dei abundantiam; agnoscat se non esse fontem & originem ornatus mundani, sed à fonte & ab origine vera dependere. Adde & hoc, quod in Opticis dixi; contemplationis

D

causa,

causa, ad quam homo factus, oculisq; ornatus & instructus est, non potuisse hominē in centro quiescere; sed oportere, vt nauigio hoc Telluris, annuo motu circūspacietur, lustrandi causa: non secus atq; mensores rerum inaccessibleum, stationem statione permutant, vt triangulo mensorio iustam basin ex stationum interuallis concilient.

Post Solem autem, non est nobilior globus, aptiorque homini quam Tellus. Nam is primum numero medius est ex globis primariis (circulatoribus hic, & Lunæ globo circumterrestri seposito, vt par est) habet enim supra, Martem, Iouem, Saturnum: infra complexum sui circuitus, currētes Venerem, Mercurium, & tornatum in medio Solem, cursuū omnium incitatorem, vere Apollinem; qua voce Brunus crebro vtitur.

Deinde cum quinq; corpora abeant in duas classes, trium primariorum, Cubi Tetraedri Dodecaedri; duorum secundariorum Icosaedri & Octaedri: telluris circuitus, sic inter vtrumque ordinem, veluti maceries intercedit, vt superius dodecaedri centra planorum duodecim, inferius respondentis Icosaedri angulos duodecim stringat: quo vel solo situ inter figuras, præ cæteris orbibus notabilis est orbis Telluris.

Tertio nos in Tellure Mercurium, planetarum primariorum vltimum, vix visu apprehendimus, propter propinquam & nimiam
Solis

Solis claritatem. Quanto minus in Ioue vel Saturno, Mercurius conspicuus erit? Summo itaque consilio hic globus homini videtur attributus, ut omnes planetas contemplari posset. Adeoque quis negabit, in compensationem latentium apud Iouiales, planetarum eorum, quos nos Terricolæ videmus; attributos esse Ioui quatuor alios, ad numerum quatuor inferiorum, Martis, Telluris, Veneris, Mercurii, Solem ambientium intra Iouis ambitum?

Habeant igitur creaturæ Iouiæ quo se oblectent, sint illis etiam, si placet, quatuor sui planetæ dispositi ad normam classis trium rhombicorum corporum; quorum vnum (quasi rhombicum) cubus ipse est, secundum Cuboctaedricum, tertium Icosidodecaedricum, sex, duodecim, triginta planorum quadrilaterorum: habeant inquam illi sua: nos Homines Terricolæ non utique frustra (me doctore) de præstantissima nostrorum corporum habitatione gloriari possumus, Deoque conditori grates debemus.

Hæc super nouis dubitationibus, quas tuis Galilææ experimentis excitasti, philosophice tecum differere mihi placuit.

Sed cum sæpius iam structuram mundi per quinque regularia corpora, ex meo mysterio Cosmographico adduxerim, tribus verbis objectionem initio epistolæ tactam, penitus eliminabo.

Cū quatuor hi planetæ angustissimis mea-

ribus Iouem ipsum circumambulent; nemo metuat, turbatum iis iri-rationem meam interpolationis figurarum Pythagoræ inter planetas. Quin potius spero hos circulatores fo-nios, & si quos habent alii etiam planetæ, tandem omnem quæ restat discrepantiam subla-turos. Rationem enim à Deo etiam horû cir-culatorum habitam in figurarum interpositi-one, circulator terræ, Luna scilicet arguit, cu-ius circuitum circa terram negligere non po-tui, cum illud negotium serio tractarem.

Adeoq; etiamnum in restitutione orbium & motuum Martis, Telluris, Veneris, ex obser-uationibus Brahei, deprehendo hiare pluscu-lum interstitia, vt Dodecaedri angulis, à Peri-helio Martis extensis, non assequantur centra planorum, Lunam in Apogæo suo & Aphelio Telluris constitutam: neque centra Icosaedri Aphelio Veneris accommodata porrigant an-gulos Icosaedri vsq; ad Lunam in Apogæo suo & Perihelio Telluris constitutam: quod argu-mento est, superesse aliquid loci inter Perihe-lium Martis & angulos Dodecaedri; sic inter centra Icosaedri & Apheliū Veneris; & quod miraculo esse possit, paulo plus illic, quam hic: quibus ego spaciolis spero me Lunas circum-Martiales & circum-Venerias, si quas Galilæe olim deprehensus es, facili-è locaturum.

Tecum Galilæe incepti, tecum finem fa-ciam. Miraris non frustra: cur tanto discrimi-ne magnitudinis Medicea sidera suas mutant facies.

facies. Causas, quas comminisci quis posset, tres reiiicis argute & mathematice. Ponis vnâ physicam vt possibilem: de qua tempus docebit. Occurrit vero mihi ista: si quatuor hi planetæ, disci forma plano ad Iouem conuerso circumeant, vt ad excursus maximos nobis & Soli obiiçantur vt Lineæ, supra & infra irradiantur perpendiculariter, videanturque magni, & forte diuersi colores sint, pro diuersitate planicierum. Sufficiat monuisse.

Quod superest, vehemēter abste peto Galilæe celeberrime, vt in obseruando strenue pergas, quæque obseruando fueris affecutus, nobis primo quoque tempore communices, deniq; prolixitatem hanc meam, dicendi-
que de Natura libertatem boni
consulas. Vale. Pragæ

19 April. 1610.

Post

Post scripta.

*Si unum adhuc diem expectassem, Galilae mutuum
rependere potuissem. Noua enim, non vt Galilaei, pro-
babilia, licet inaudita; sed contra, longe absurdisima,
licet saepe iactata, retulit. Catalogus Nundinarum Fran-
cofordensium, Thomam quendam Gephyrandrum
Circulum quadrasse. Nulla hic iam fides oculis: Ratio
vero aures ad primam famam obturauit.*

*Alius Wolfgangus Satlerus Basileensis, Mercu-
rium (& ipsum iam olim Deorum nuncium credi-
tum) emittit, significatum Astrologis, Triginta Gra-
dum Aspectum efficacem esse. Gratulor ipsi de agnita
domi veritate. Foris in parte falsus est nuncius: errat
in primo inuentore. Monuit Mastlinus Thesibus suis de
mictuum varietate, anno 1606. ed. tis. Vsurpauit ego
hunc aspectum ab anno 1603. Videatur & meus Ter-
tius. Interueniens, his iisdem Nundinis prodiens.*

*Nomen Semisexto dedi. Rationem eius
pulcherrimam pollicentur
mea Harmonica.*



